

Na osnovu člana 22. Zakona o lokalnoj samoupravi («Službene novine Zeničko-Dobojskog Kantona», broj:13/98 i 8/00) i član 55. Statuta Općine Zavidovići («Službeni glasnik Općine Zavidovići» broj:11/2004-prečišćen tekst, 8/2005 i 2/2006), Općinsko vijeće Zavidovići, na 29. sjednici održanoj dana 28.12.2006. godine, utvrdilo je

ETIČKI KODEKS IZABRANIH ZVANIČNIKA OPĆINE ZAVIDOVIĆI

I – UVODNI DIO

1. Sadržaj ovog Kodeksa utvrđuje okvir etičkih principa ponašanja za lokalne javne zvaničnike, prilagođene postojećem zakonodavstvu, propisima i principima lokalne samouprave.
2. Predmet ovog Kodeksa su osnovni principi standardiziranog ponašanja koje građani očekuju od izabranih predstavnika u vršenju njihovih dužnosti, što će održavati i snažiti povjerenje građana prema institucijama, u funkciji općeg interesa.
3. Svrha Kodeksa je da se njegovim prihvatanjem i dosljednom primjenom uspostavi primjeren nivo korektnog odnosa i kulture dijaloga, a u cilju promoviranja sveukupnog ugleda Općinskog vijeća i Općine Zavidovići.

II – PRIMJENA KODEKSA

4. Kodeks se odnosi na sve izabrane lokalne zvaničnike, a kojima je mandat povjeren putem neposrednih izbora, kao i skup dužnosti koje izabrani zvaničnik obavlja u okviru mandata.
5. «Izabranim zvaničnicima» smatraju se:
 - vijećnici Općinskog vijeća,
 - načelnik općine.

III – OSNOVNI PRINCIPI PONAŠANJA

6. Izabrani zvaničnici, prema odanosti svečanoj izjavi, u svim slučajevima moraju se pridržavati Ustava, zakona, Statuta općine Zavidovići, Poslovnika o radu Općinskog vijeća Zavidovići i drugih propisa, zanemarujući političku pripadnost ili naklonost.
7. U vršenju povjerene funkcije, u svim prilikama, izabrani zvaničnici služiti će općem interesu, zalagati se za ljudska prava i slobode, ravnopravnost naroda i građana.
8. Izabrani zvaničnici obavljati će povjerne funkcije i dužnosti savjesno i odgovorno, uz naglašenu otvorenost i spremnost da odgovaraju za svoje odluke, djelovanja i ponašanja.
9. U obavljanju svojih funkcija, izabrani zvaničnici će uvažavati prava i ovlaštenja drugih predstavnika i državnih službenika, suzdržavajući se od poticanja ili pomaganja da u izvršavanju povjerenih funkcija i radnih obaveza krše uspostavljena pravila ponašanja.

IV- UZAJAMNO POŠTOVANJE i UVAŽAVANJE

10. U međusobnoj komunikaciji i uopšte komunikaciji sa javnošću kao i sa zaposlenima u lokalnoj upravi izabrani zvaničnici će u svakom slučaju istupiti sa uvažavanjem i poštovanjem, izbjegavajući korišćenje izraza koji mogu vrijeđati ili omalovažavati druge ličnosti ili grupe, na taj način poštujući jednako pravo svih na uvažavanje njihove ličnosti i uvjerenja.
11. Izabrani zvaničnici neće bez opravdanog razloga izostajati sa javnih manifestacija, javnih skupova ili prisustvovanju seminarima, savjetovanju i drugih oblika edukacije, na koje su uredno i blagovremeno pozvani u svojstvu izabranog zvaničnika. O razlozima eventualnog izostanka blagovremeno će obavijestiti organizatora manifestacije ili skupa.

V – POSEBNE OBAVEZE

Izborna kampanja

12. Odredbe ovog Kodeksa odnose se i na istupanja kandidata u periodu izborne kampanje. Kandidat za određenu funkciju u toku kampanje težiti će da glasove birača pridobije poštenim i argumentovanim istupom, bez nekorektnog odnosa prema ostalim kandidatima u kampanji.

Zabrana favorizovanja

13. Vršeci dužnost izabranog zvaničnika, izabrani zvaničnici neće zloupotrebljavati svoja ovlašćenja u svrhu vlastitog interesa, odnosno interesa drugih pojedinaca ili grupa.

Sukob interesa

14. Pored zakonske obaveze kada je izabrani zvaničnik obavezan da se uzdrži od vijećanja i glasanja u određenoj pravnoj stvari kod izabranog zvaničnika postoji i moralna obaveza da se zbog ličnog interesa uzdrži od naprijed navedenih radnji i da na to ukaže prije otvaranja rasprave po tom pitanju.

Lične pogodnosti

15. Pri obavljanju diskrecionih ovlaštenja, izabrani zvaničnici neće za sebe ili druge osiguravati bilo kakve pogodnosti.

Donošenje odluka

16. Odluka izabranih zvaničnika, u vršenju funkcije zasniivat će se na objektivnosti, odgovornosti i otvorenosti sa elementima uravnoteženosti sa općim interesom, uz spremnost na odgovornost za svoje odluke.

Način komuniciranja

17. Izabrani zvaničnici u ostvarivanju komunikacije izbjegavat će obmanjivanje, manipulaciju, samopromociju i neučtivost u kreiranju i vođenju dijaloga.

Povjerenje javnosti

18. Izabrani zvaničnici treba da usmjere svoje ponašanje u skladu sa javnim interesom, te da izbjegavaju konflikte i snaže povjerenje javnosti prema državnim institucijama.

Zabrana korupcije

19. Ovaj Kodeks isključuje prihvatanje mita i svakog drugog ponašanja, koje bi se prema važećim propisima moglo podvesti kao aktivno ili pasivno podmićivanje.

Upravljanje resursima

20. Zahtjev je da izabrani zvaničnici javnim i službenim resursima upravljaju na efektivan, transparentan, efikasan i ekonomičan način isključujući njihovo korištenje u privatne svrhe.

Finansijska disciplina

21. Izabrani zvaničnici ne mogu nalagati isplate ili naknade u oblastima upravljanja javnim prihodima, mimo načina regulisanog važećim propisima.

VI- ODNOSI PREMA OPĆINSKOJ UPRAVI

22. Izabrani zvaničnici će vlastitim ponašanjem onemogućiti imenovanje službenika i namještenika mimo utvrđene procedure, profesionalne sposobnosti i osnovnih principa vrijednosti .

23. Izabrani zvaničnici će podsticati i razvijati motivacione elemente da svi zaposleni rade brzo, efikasno, stručno, odgovorno, zakonito, pouzdano i kreativno.

VII - OBLAST NADZORA

24. Izabrani zvaničnici će podržati bilo koju mjeru nadzora koju budu vršili nadležni organi, uvažavat će izrečene privremene ili konačne odluke koje proizilaze iz rezultata nadzora, čija svrha je javna osuda neprihvatljivog ponašanja suprotnog Kodeksu.

25. Za svoj rad izabrani zvaničnici bit će odgovorni lokalnom stanovništvu u mandatnom periodu na koju su izabrani.

26. Izabrani zvaničnik na rukovodnoj poziciji treba osjećati odgovornost za ponašanje onih koje nadzire.

VIII – PRAĆENJE PRIMJENE KODEKSA

27. Praćenje i nadziranje ponašanja izabranih zvaničnika vršit će Etička komisija, kao stalno radno tijelo imenovano od strane Općinskog vijeća.

28. Etička komisija ima predsjednika, zamjenika predsjednika i tri člana, a sačinjavaju je jedan vijećnik, predstavnici nevladinih organizacija i sredstava javnog informisanja te ugledni građani.

29. O svome radu Etička komisija donosi poseban Poslovnik.

30. Svaki građanin može prijaviti Etičkoj komisiji kršenje odredbi ovog kodeksa od strane izabranih zvaničnika. Prijava ne može biti anonimna, mora sadržavati ime podnosioca prijave i kontakt adresu, dostavlja se isključivo u zatvorenoj koverti.

31. Etička komisija nakon podnošenja prijave u roku od 30 dana pokreće postupak provjere.

32. U roku od 60 dana (nakon što je primljena prijava) postupak provjere treba biti zaključen.

33. Za povredu odredbi ovog kodeksa Etička komisija može izreći slijedeće mjere:

- ukor,
- javni ukor, uz objavljivanje izvještaja i odluke o izricanju mjera,

34. Ako Etička komisija nakon provedenog postupka zaključi da nije bilo povreda neke od odredaba ovog Kodeksa, o tome će obavijestiti podnosioca prijave, a Općinsko vijeće će o takvim slučajevima obavještavati najmanje šestomjesečno.

35. Ako Etička komisija nakon provedenog postupka zaključi da je izabrani zvaničnik učinio povredu odredaba ovog Kodeksa podnijet će Općinskom vijeću detaljan izvještaj sa preporukom za izricanje mjere.

36. Odluku o izricanju mjere Općinsko vijeće donosi većinom glasova od ukupnog broja vijećnika.

37. Javni ukor sa objavljivanjem izvještaja i odluke se izvršava objavljivanjem Izvještaja i Odluke o izricanju mjere na općinskoj oglasnoj tabli i u lokalnim sredstvima javnog informisanja.

IX – PODRŠKA KODEKSU

38. Izabrani zvaničnici će se upoznati sa sadržajem i suštinom ovog kodeksa te njegovim principima uz pismenu izjavu da ih prihvataju i podržavaju.

39. Predsjedavajući Općinskog vijeća će sa najvećom pažnjom pratiti ostvarivanje principa utvrđenih ovim Kodeksom i bit će ovlašten da u svakom momentu upozori na obavezu ponašanja u skladu sa Kodeksom, kao i da preduzme druge mjere u skladu sa Poslovnikom Općinskog vijeća.

40. Obaveza izabranih zvaničnika je da svojom aktivnošću osiguraju promociju ovog kodeksa, kako u javnosti tako i u medijima.

41. Predmetni kodeks objavit će se u Službenom glasniku Općine Zavidovići, općinskoj oglasnoj tabli i osigurat će se uslovi za njegovu dostupnost javnosti putem web stranice.

42. Etički Kodeks stupa na snagu danom objavljivanja u Službenom glasniku Općine Zavidovići.